

मारवाडी

भासा मे पढण अर लिखण
री कहाणियो री दुजी किताब



मारवाड़ी भासा मे पढण अर लिखण री कहाणियो री दुजी किताब
(Reading and Writing in Marwari: Story Book-2)

छापणाळो बर: जून 2018
छापी जकी किताबो री गिणती: 200

© निर्माण सोसायटी

त्यार करणाळा

गंगाराम, रमेश, राजेश चारण, मनोज कुमार अर हरि-किशन

मदत करणाळा

कमलेश रोलन, मुकेश कुमार योगी, शैला डिसौजा, फेबा जोस
अर मारवाड़ी समुदाय

टाइपसेटिंग

रतन लाल योगी

प्रकाशन

निर्माण सोसायटी

तीसरी मंजिल, फ्लेट नं.3, गुलाब कॉम्प्लेक्स,
तहसील रोड़, औसियाँ, जोधपुर, राजस्थान-342303

Email- rajasthanlanguages@nirmaan.org.in

Web- www.nirmaan.org.in

Ph.02922-274017

सब अधिकार सुरक्षित हैं

प्रकाशन की अग्रिम लिखित अनुमति के बिना, इस प्रकाशन का कोई भी भाग-आण्बिक, यांत्रिकी, रिकॉर्डिंग व अन्य किसी भी रूप में या अन्य माध्यम से पुनः उत्पादित नहीं किया जा सकता और न ही पुनःप्राप्ति पद्धति में इसका भंडारण किया जा सकता है, या प्रसारित किया जा सकता है।

जोण-पेचाण

आ कहाणियो री दुजी किताब है। आ किताब मारवाड़ी पढण अर लिखण री दूजी किताब रे अधार माथे बिणायोड़ी है। इण किताब रे माई दुजी मारवाड़ी पढण अर लिखण री किताब रा सबदो ने ले परा अन बिणायोड़ी है। इण किताब रे माई दियोड़ीक कहाणियो में आपने बेईज सबद मिळेला जका सबद आपने मारवाड़ी पढण अर लिखण री दुजी किताब में दियोड़ा है अर आ किताब मारवाड़ी पढण अर लिखण री किताब रे साथे पढावण री किताब है जकेऊ ऊ थाने बे सबद जादा समझ आवेला। इण किताब रे जरिये आप बे सबद बेगा समझ सको हो।

आ किताब इणी वास्ते छापी हो के इणू पेला थे जकी किताब (मारवाड़ी भासा ने पढण अर लिखण री) पढोला उण रे माई जका सबद थे सिखोला बेई सबद थोने इण किताब में दियोड़की कहाणियो में अन आपने बे सबद इण कहाणियो रे जरिये पैचाणना है। अन आपने बे सबद किकर लिखी जे है अन किकर पढीजे है ओ बतावणो है। अन बे सबद आपने इण किताब रे माई दियोड़की कहाणियो रे जरिये बतावणो है।

आपने इण किताब री मदत ऊ आप बेगा पढण लिखण सिख जावोला। इण किताब में जिकी कहाणियो दियोड़ी है बे कहाणीयो मारवाड़ी भासा ने पढण अर लिखण री किताब रे सबदो रे आधार माते बणायोड़ी है। आप ए कहाणियो पढ अन बे सबद जादा बेगा सीख जावोला के बे सबद कटे अर किकर लिखी जे है।

पाठ-1

खोण में कोम

चकलोटो

डेडरो

चीण



एक मिनक खोण मे कौम करतो हो अन आपरी खोण मू चीणो काडतो हो चीणो काड अन चीणो ने बेचतो हो। चीणो ऊ जिकी मजूरी होवती ऊणू आपरो घर चलावतो हो। एक दिन उन्नी खोण रे माई एक चीकणो भाटो आयो अन बो मिनक उण चीकणे भाटे रो चकलोटो बणायो अन चकलोटो बणा अन आपरे घरे लेगो अन चकलोटे रे माते रोटियो बणाई अन पाछो खोण मे आयो अन खोण रे माई एक भाटे रे हेटे एक डेडरो दबयोड़ो हो अन बो मिनक उण डेडरे ने देखियो अन डेडरे ने बारे काडियो अन डेडरे ने बारे काड अन आगो छोड अन आयो अन पाछो आन उण चिकणे भाटे रा घणा सारा चकलोटा बणाया अन उण चकलोटो री कमाई ऊ बो मिनक लखपति हू गियो।


पाठ-2

खेती

गाय

हती

खरगो



एक मिनक गाय लेन आयो गाय रे कुचे रे वास्ते बो मिनक खेत बायो अन कुचो बोटण रे वास्ते एक मसीन लेन आयो अन आपरे खेत रे माई बो घणा सारी गाजरो बाई। बो मिनक रोजिना आपरी गाय ने खेत मे ले जावतो। एक खरगो मिनक रे खेत मु गाजरो खावतो हो। जणे बो मिनक खरगो गाजर नी खावे इण वास्ते खरगे ऊ खेत ने बचावण वासते खेत री रुकाळी राखतो। खरगे ने आपरे खेत मे नी आवण देतो हो। एक दिन मिनक गाय रे मसीन ऊ कुचो बोटतो हो उण टेम मसीन री हती भागगी हती भागी जणो कुचो बोटण मे तकलीप होवण ढुकगी। जणो बो मिनक मसीन री हती सावळ कराई हती सावळ करा अन आपरे घरे आयो अन गाय ने कुचो बोट अन नोखयो इयो करतो करतो पछे उन्ने खेत रे माई खरगे रो आवणो ई बंद हो गियो।


पाठ-3

नोकरी रो इलम

हळ

चक्कू

डाक्यो



एक मिनक आपरे खेत मे हळ ब्रावतो हो जणो हळ ब्रावतो ब्रावतो दैपारो री टेम मे उण मिनक रे खन्ने एक डाक्यो आयो अन बो डाक्यो एक डाक लेन आयो अन डाक्यो बा डाक उण हळ बावतो जके मिनक ने दिनी। अन डाक्यो बा डाक उण हळ बावतो जके मिनक ने पड अन सुणार्ई अन केयो के उन्नो बेटो नोकरी ऊ घरे आवे है। जणो बो मिनक डाक्ये ने बेवोणियो अन एक मतीरो लेन आयो अन मतिरे ने चक्कू ऊ ब्राढयो अन चक्कू ऊ ब्राड अन उन्नी फाडियो करी अन पछे दोई खायो। मतिरो खा'न डाक्यो तो गियो परो अन बो मिनक चक्कू ने सावळ रख अन पाछो राजी राजी हळ ब्रावण लागगो।


पाठ-4

मदत करणी

भाकर

लग्गियो

इग्यारै






एक मिनक भाकर रे माई कौम करतो मोटा मोटा भाटा लग्गिये ऊ आगा सिरकावतो हो एक दिन बो लग्गिये ऊ दस इग्यारै क भाटा आगा सिरकाया अन के लग्गियो भागगो लग्गियो भागो अन के बे दस इग्यारै ई भाटा भाकर ऊ नीचे आ गया। हमे पछे बो मिनक उबो देख बोकरियो हो पण की नी कर पायो। अन बो मिनक दुजो मिनको री ई घणी मदत करतो हो जणो उन्नी मदत रे वास्ते ई दस इग्यारै मिनक भेळा हून आग्या अन पाछा उ ओ दस इग्यारै भाटो ने उचा अन पाछा भाकर रे माते ले गया।

पाठ-5 छपरे रो छज

छपरो

पंचावो

लच्छी




एक मिनक रे छपरो में रे माई छवतो घणो हो जणो बो एक दिन आपरे छपरे ने तियार करण रे वास्ते छज वास्ते फिरियो अन उने कटेई छज नी मिळियो जणो बो एक डोको रो पंचावो खरीद लियो अन उण पंचावे ने खरीद अन पंचावा र डोका आपरे घरे ले गियो घरे ले जा'न छपरे ने पंचावे रे डोका ऊ छज दियो पण डोका हवा रे माई उडण लागा जणो बो मिनक सुथळियो री लच्छीयो लेन आयो अन उण लच्छी रे डोरो री राळिडयो गुंथी अन आपरे छपरे ने सेठो बांदियो पचे उण मिनक रे छपरो ई नवो हुगो अन बढिया हुगो अन जकी लच्छीयो बची ही बे लच्छियो बो बेच दिनी पच्चे उण मिनक रो छपरो कदेई में में नी छवियो हो।

पाठ-6 खेत मे बिगाड़

फळी

मज्जीद

पट्टो



एक मिनक रो खेत एक मज्जीद रे खन्ने हो। उण मिनक रे खेत रे माई ग्वार बायोड़ी ही अन ऊण ग्वार रे अनाप री फळी यो लागोड़ी ही। रोजिना मिनक उण मज्जीद रे माई आवता हाँ अन उण मिनक रे खन्नु फळीयो खरीद अन ले जावता हाँ। ऊण मिनक रे खेत रे माई बिगाड़ घणो हो जणो बो मिनक एक कुत्तो लेन आयो अन उण कुत्ते रे गळे में एक पट्टो बांधियो हो अन बो मिनक उण कुत्ते रे गळे रे मोले पट्टे ऊ उण कुत्ते ने बोधतो हो। एक दिन मज्जीद रे माई घणा मिनक आया अन घण मिनको ने देख अन कुत्तो डर गियो अन कुत्तो बो पट्टो तोड़ा अन ना गियो। अन पचे उन्ने खेत रे माई घणी सारी गायो बड़ी अन ग्वार एई फळीयो सैंग खा गी। बो मिनक खेत में आ'न देखियो अन पछे घणो दुखी होयो।

पाठ-7

धणी लुगाई रो परेम

थाळी

पत्ता

कत्यो



एक गाँव रे माई एक गरीब धणी लुगाई रेवता हाँ। उओरे घर में ठोव ठाव में खावण रे वास्ते एक थाळी इज ही अन बे दोई उण एक थाळी रे माई खावता हाँ अन उण थाळी में इज रोटी दुजी बणावता हाँ। एक दिन उन्नी लुगाई मिनक ने केयो के म्हारा कोन बूटा है जको कोनो रे माई पत्ता करावणा है जणो बो मिनक पाकती सोनारो री दुकोन माते गियो अन एक कत्यो लेन आयो अन उण कत्ये ऊ बो मिनक थाळी ने बाढ अन कत्ये ऊ थाळी री चद्दर रा पत्ता बणाया। पत्ता बणा अन आपरी लुगाई ने दिया। लुगाई उण पत्तो ने देख अन घणी राजी हुई पण जद उन्ने ठा पड़ियो के पत्ता थाळी रा बणाया जणो बा घणी दुखी हुई। आपरे धणी रो परेम देख अन मन ई मन में घणी राजी हुई। दोई राजी राजी रेवण लागा।

पाठ-8 पोन्नौ रो ठाठियो

ठाठियो

पोन्नौ

मिन्या



एक लुगाई आपरे घर में रोटियो रखण रे वास्ते एक ठाठियो बणावण री सोची जणो बा घणा सारा पोन्ना भैळा कर अन उण पोन्नौ ने गाळ अन पोन्नौ रो एक ठाठियो बणायो अन बा उण ठाठिये रे माई रोटी दुजी रख अन राजी राजी रेवती ही। पण एक दिन उण घर रे माई मिन्या आया जको बे मिन्या घर में बड़ अन ठाठियो ने भोंग दियो अन बा लुगाई जद ठाठियो भागोड़ो देखियो अन री रे माई मिन्यो ने ठोकिया अन बे मिन्या ऊठू ना गया अन पछे बा लुगाई पाछा घणा सारा पोन्ना भैळा करिया अन उण पोन्नो ने गाळ अन पाछो एक ठाठियो बणायो।

पाठ-9

गाडी गुड़गी

धणक

पीप्पो

डब्बो



एक दिन तावड़े रे माई मै बरियो पछे अकास में धणक खंचियो धणक मोटो घणो हो। गाँव रा मिनक उण धणक ने उबा देखता हाँ। अटिनु एक गाडी पीप्पो ऊ अन घी रे डब्बो ऊ भरियोड़ी आई ही अन पीप्पा तेल ऊ अन डब्बा घी ऊ भरियोड़ा हाँ। बा पीप्पो ऊ अन डब्बो ऊ भरियोड़ी गाड़ी एक दम गुड़गी गाडी गुड़ी अन के मिनक बे तेल रा पीप्पा अन घी रा डब्बा आपो आप रे घरे ले गया। पछे पाछा आ अन गाडी ने बैठी कराई अन गाडी ने रवाना कराई।



पाठ-10

ब्याव बिगड़ग्यो

मौड़

चम्मक

थम्बो



एक छोरे रे ब्याव में छोरे घराळा छोरे रे मौड़ दिल्ली ऊ मंगायो। मौड़ मंगायो जको मौड़ में चम्मक लगायोड़ी ही। उण चम्मक री चम्मक ऊ छोरे रो साफो अन मौड़ दोई अनाप रा चमकता हाँ। पछे भाईसेणो रे बैठण रे वास्ते टेण्ट लेन आया। टेण्ट लगावण रे वास्ते थम्बा रोपिया। थम्बा डिगा घणा रोपिया। थम्बा रोप अन मिनक नीचे बैठा अन के ओंधी आई जको ओंधी रे माई थम्बा हेटा पड़ग्या। थम्बा हेटा पड़िया जको मिनक टेन्ट रे हेटे दब गिया। छोरे रो मौड़ बिखर गियो। पछे मिनक पाछा खप अन थम्बा रोपिया अन छोरे ने मौड़ दुजो बोंध अन जोन चाड अन पन्ना अन लेन आया।


पाठ-11

मस्से रो इलाज

घोड़ो

मस्सो

घास्यो



एक मिनक रे मुण्डे माते मस्सो हुयो। बो मिनक मस्से रे इलाज वास्ते घणेई देसी परदेसी इलाज करायो पण उण मिनक रे मस्सो तियार नी होयो। एक दिन गाँव में एक वेदजी आया। अटिने सियाळे रो टेम हो। वैदजी रे खन्ने ओढण रे वास्ते घास्यो एक इज हो। वेदजी दुजो घास्यो लावण रे उण मिनक रे घरे गया। उण मिनक रे खन्नु एक घास्यो मोंगियो। मिनक वैदजी ने घास्यो दियो। वेदजी ने आपरे मस्से रो बतायो। वैदजी उन्ने इलाज बतायो के थू एक घोड़ा री पूछ रो बाळ लेजे। बो घोड़ा री पूछ आळो बाळ मस्से रे माते बोंध देजे जको बो घोड़े री पूछ रो बाळ मस्से ने काड देई है। मिनक घोड़े री पूछ रो बाळ ला'न बोंधियो। थोड़ाक दिनो पछे उन्नो मस्सो सावळ हुगो।


पाठ-12

बिंदोळ्यो बणायो लखपति

ढकणो

गल्लो

बिंदोळ्यो



एक मजुर हो जको बो मजुरी करतो हो। आपरो गुजारो चलावतो हो एक दिन बो दिनमध्ये री टेम रा घरे आवतो हो। रस्ते में एक बिंदोळ्यो घायल होयोडो पड़ियो हो। उण बिंदोळ्ये रे खन्ने एक गल्लो पड़ियो। मजुर उण बिंदोळ्ये ने अन गल्ला ने आपरे घरे लेन गियो। बिंदोळ्ये ने एक ठोव रे माई ढकणो लगा अन ढक दियो। रोजिना बो ढकणो खोल अन बिंदोळ्ये ने खावण पीवण री चीजो देवतो। बिंदोळ्ये ने घणेई सोरो राकतो हो। कौम माथे जावतो जणो ढकणो लगान ढक अन जावतो। घरे आवतो जणौ ढकणो खोल देवतो हो। एक दिन मिनक ने रुपियो री घणी जरुत पडी जणो बो मिनक उण गल्ला ने फोड़ियो। गल्ले रे माई हिरा पन्ना निकळया। मजूर उण हिरा पन्ना ने बेच अन लखपति हुगो। बिंदोळ्ये रे बास्ते एक बढिया ढकणो लगान बढिया पिजरो घड़ायो। दोई राजी खुसी रेवण लागा।

पाठ-13

टाबरो रो परेम

झण्डो

गुड्डी

घुण्डी




एक मिनक मेळे रे माऊ आपरे टाबरो रे रमण रे वास्ते एक झण्डो, एक गुड्डी अन एक डरेस लिनी। कोलर माते घुण्डी लागोडी ही। घुण्डी चमकिली ही। घुण्डी ऊ डरेस ई गजब बडिया लागती ही। मिनक बा गुड्डी अन झण्डो लेन आपरे घरे गियो। टाबरो ने बे गुड्डी अन झण्डो दियो अन डरेस छोरे ने पेराई। पछे टाबर उण गुड्डी अन झण्डे ऊ रमता रमता भोंग दिया। लड़िजिया जको डरेस री घुण्डी ई तोड़ दिनी अन रोवण लागा। मिनक टाबरो ने बोला राखिया अन डरेस रे घुण्डी पाछी लगाई अन गुड्डी अन झण्डे ने सावळ करिया अन टाबरो ने दिया।

पाठ-14

सियाळियो रो डर

सियाळियो ब्रैण्ड-बाजा



एक गाँव रे माई सियाळियो रो आंतक घणो हो। सियाळिया रोजिना गाँवळो रा जिनोवर खा जावता हाँ। गाँवळा सियाळियो ऊ घणा दुखी हाँ। बे सियाळियो ने मारण रे वास्ते एक सिकारी लेन आया। सिकारी ऊ सियाळिया काबू नी होयो। पछे गाँवळा भेळा हुन एक योजना बणाई। गाँव रे माई ब्रैण्ड-बाजा लेन आया अन बे ब्रैण्ड-बाजा रातरी टेम में बजावता हाँ। ब्रैण्ड-बाजा री अवाज ऊ सियाळिया डर अन गाँव में नी आवता हाँ। केई दिन इयोजी हालियो अन ब्रैण्ड-बाजा री अवाज ऊ डर अन सियाळिया गाँव में आवणा छोड़ दियो। गाँवळा पछे गाँव में राजी खुसी रेवण लागा।

